



*a cura di Ezio Baglini*

**Gabriele Faggioni, Alberto Rosselli, Le operazioni aeronavali nel mar Ligure 1940-1945, Ligurpress 2011, pagg. 192.**

Se o titolo o dixè za tutto a-i apascionæ da stöia da goæra visciûa into mâ Ligure, e se da-i doî aotoî poemo solo aspêtâse e megio informaçioin e de ciù precize de dæto che son za conosciûi pe-e seu publicaçioin, n'aprofitémmo aloa pe intrategnise in pitin in sciâ Ligurpress. A l'é 'na caza editriçe ch'a vanta oltre çinquanta libri con tema Zena e a Liguria: da-i fòrti, tenplari e balestrê a-a cuxinna; da-e strê, stregoin e fantastiche magîe a-i eventi da goæra; da-e goidde do teritöio atoale a-a seu preistöia. A veste grafica a l'é inportante, ben curâ e asæ sodisfaccente pe-a qualità do papê e da scritûa: in bello travaggio editoriale a 'n prexo contegnûo. L'é coscì poscibile pe tutti de arichî a seu biblioteca con di belli libri in sce di argomenti interessanti e soviatutto ben documentæ a tema locale regionale.




**E. Baglini, F. Bampi, E. Gaggino, F. Lottero, F. Majocco, A.G. Remedi, Dall'alba del Risorgimento all'Unità d'Italia, S.E.S. 2011, pagg.158**

Di aotoî, ben quattro son söcci de "A Compagna". Son anæti a ravatâ tanto da poei dimostrâ l'inportante parteci-paçion a-o grande evento de l'Unitæ da parte do borgo de San Pê d'Ænn-a, poi çitæ autonoma, e de san Teodô, sestê de Zena, oua rionîi inte 'n unico Municipio. Parteci-paçion atîva, comme dimostra o busto da covertinn-a, dedicou a-o pluridecorou Stêva Lagorara, prezente in-semme a tanti âtri garibaldin into camposanto da Castagna, dove gh'é asoterou adreitûa quarche garibaldin ch'o no l'é riportou inti elenchi ofiçiâli. Parteci-paçion organizatîva e ideologica: patrioti fucilæ; ospitalitæ a-e

truppe françeisi che co-a ferôvia anian a finî into grande carneficinn-a de Solferin; i operai da SMS Universale, prezenti a Sapri e pöi copromotöi da partensa di Mille; l'acheugge i tanti patrioti profughi ò eziliæ; a dedica do tiatro a-o mazinian Gustavo Modena; e dônne con rôlli solo aparentemente secondâi.

L'identitæ de 'na çitæ a l'à reixe ben ciantæ, comme queste, contæ into libro.



**Tringali Sebastiano, Uniti nell'Italia unita, Ames 2011, pagg. 240**

Dón da nôstra söccia, a Socjêta Operâia Universâle de San Pê d'Ænn-a. Gh'é descrîto in mòddo pontoale o mondo do travaggio manoale, visto da-a parte de l'operâio zeneize, de asociaçioin fraterne e cooperative; de l'instruçion e-a coltûa do popolo; da parteci-paçion a-o processo unitaio: partezâ con Mazzini e Garibaldi; do seu unico patrimonio: o travaggio.

L'é de segûo 'na manêa diversa de vedde l'Unitæ nazionale, rispetto a quella de solito proposta inte schêue e da-a coltûa stòrica clascica. Ma no meno inportante perché in fondo, son stæti loiatrî a anâ a combâtte ò a travaggiâ; loiatrî l'Unitæ no solo l'ân pensâ, ma soviatutto l'ân fæta inte oficinn-e o in scî canpi de bataggia co-i garibaldin. Concluede o libro 'la novella di Masino', contâ in fumetto da-o Lucca De Santis.

